



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 7



India-i Pakistan linük nem teyari magütsütsüa akok: S Jaishankar

Ukraine rara ya West-i tenzük, Russia-i temdaksütsü meranger: Putin



VOL. XX NO. 132 (ADOK 132)

DIMAPUR YANGTEPNÜ (THURSDAY)

TSÜKLAI (FEBRUARY) 23, 2023

₹ 5.00

PM Modi-i Nagaland semdangtsü

Dimapur, February 22, 2023 (Agencies): Nagaland nung Honibarnü election nüboyimba maparen tembangtsü aser iba jakdang Prime Minister Narendra Modi-i Nagaland semdangtsü.

PM Modi-i Dimapur nung Nationalist Democratic Progressive Party (NDPP) aser Bharatiya Janata Party (BJP) külem sentong ka nung o jembitsü.

Ita pezü tsüngda PM Modi-i

Nagaland tasembenbuba semdang asütsü.

"NDPP aser BJP teloktemi PM Modi arutsü atema yongyar aser pa pelaa agizüksü atema maparen inyakdar" ta BJP national spokesperson aser Nagaland in-charge Nalin Kohli-i ashi.

PM Modi marudang Union home minister Amit Shah-i anogo ananü atema Eastern Nagaland semdanga liasü.

Nagaland Police-i sorkar garitem mita reprangdang Rs 6.5 lakh apu

Kohima, February 22, 2023 (TYO): Nagaland Police-i Mongulbarnü sorkar garitem nung Rs 6.5 lakh bena aliba apu. Ano police-isa election nung alemtsüba oset aika apu.

Model Code of Conduct benoka aliba nung ajemdaker police-i Nagaland state ajungalen sorkar garitem mita reprang.

DGP aser tongti ktdangsurtem dena Nagaland Police-i tesem balala nung garitem mita reprang.

Ozüng alema mapa inyaktermi sorkar garitem mesüra nija garitem nung taila government number plates enoker mesüra 'On Election Duty' ta sticker enoker senzüba

osang angazükba sülen Nagaland Police-i iba mapa ya inyak.

Parnoki mita aodang sorkar tongti ktdangsur ka indang gariji flying squad ama senzüba apu aser iba gari nung Rs. 5 lakhs bena liasü. Iba atema sorkar ktdangsur kuli tejanga magütsütet.

Ano, Chazouba nunga gari ka nung Rs. 1.5 lakh bena aliba apu aser kozüjang seret 975 den IMFL apu.

Iba mapang State/Central Government tongti ktdangsurtem den ano Mokochung-i Special Police Election Observers meina aoba escorts garitem ajak mita reprang.

Congress-i anir Centre sorkar akümtsü: Kharge

Dimapur, February 22, 2023 (Agencies): Centre nung taruba sorkariji Congress-i anir teloktep sorkar asütsü ta AICC president Mallikarjun Kharge-i ashi.

BJP-i Nagaland dena state trok-tenet ka nung rongshia sorkar aküm ta Kharge-i ashi.

"Centre nung Congress-i aniba sorkar arutsü. Onoki tanga party tem den jembitepdar. BJP-i majority mangutsü saka tanga party ajaki angutsü. Onoki Constitution aser democracy sülen anidaktsü. Modi mesüra Shah 100 arung India indang Constitution akangakanga lir" ta paisa metetdaksü.

"Nagaland nung dang masü saka Karnataka, Madhya

Pradesh, Manipur, Goa asere Uttarakhnd state tem nung BJP-i MLA tem rongshi aser sorkar atsüngdok" ta Congress President Mallikarjun Kharge-isa ashi.

BJP-i democracy aser Constitution indang jembi saka külenbo parnoki democracy anema mapa inyaker. Anungji 2024 küm nübortemi BJP dang tansütsü ka sayutsü, ta paisa shisem.

"Congress den sendaktepa aruba nisungtemi India nüjiso, linük longjemtsü atema parnok taküm bendanga agütsü. Saka BJP-ibo 2014 nung ang nüjiso anguba ama züngshir" ta Kharge-isa ashi.

Congress-i Nagaland nung terenlok bener arutsü: Shashi Tharoor

Kohima, February 22, 2023 (TYO): Congress ya Nagaland asoshi teimla indang politics asütsü aser onoki terenlok nungdakbatem bener arutsü ta Congress lenir aser MP Shashi Tharoor-i ashi.

Congress-i Nagaland nung tzü, electricity, health aser lenmang tia tajungba kümdaksütsü, ta pai ashi.

Northern Angami-II nung Congress candidate Seyievilie Sachu aser Kohima Town nung Congress candidate Meshenlo Kath na atema nüboyimtsüba sentong ka nung tanü Tharoor-i o jembi.

Chief Minister Neiphiu Rio-i aniba state sorkar mesüra Delhi nung sorkar ajanga tang nungdakba terenlok mapatem meinyak, ta pai ashi.

Delhi-i Nagaland nem Indian Institute of Science Education and Research agütsütsü nangzük saka ibaji kong lir ang ratar, ta Shashi Tharoor-i ashi.

BJP aser NDPP sorkari nangzükba ama meinyaker. Nagaland nung High Court yanglutsü sen agütsü saka ibaji samaogo. Tang state lenisüba kübok ochimashi ya ulura lir anungji Nagaland nung alirtemi senji kongi ao'ar asüngdangtsüla, ta pai ashi.

Congress-i Naga yimten latetnür aser Nagaland indang jenjang kümzüka yunür kechiyong Nagaland state ngur küm 60 buba lir. Nagaland-i küm 60 ajungba ya terenlok aser tejakleni aoba mapang ka asütsüla saka tia maka yamaji matalok, ta paisa metetdaksü.

"Nagaland tanü iba jenjang nung aliba ya Naga yimten khuret sorkartem dak kongshiba ajanga liasü saka yimten latettsü mapang tongogo. Congress-ia yimten latettsü merangdangogo saka mekottet. Ajsüaka 2015 küm Modi'er sorkari Naga Accord ngutetogo ta sangoktsü aser idangji Congress-i pa nem tenüngsang agütsü kechiyong India nung ajaki Naga khuret ya tembangdaksünür" ta Tharoor-isa ashi.

"Saka iba sangdongji asangsang nungbo matalok kechiyong parnoki iba oji meyipa agir Framework Agreement dang nangzüktep ta ashi aser tangbo ano maneni olemtepdar ta ashir" ta paisa shisem.

2019 küm Modi aser taoba Nagaland governor aser Centre atema interlocutor R N Ravi nati ita asem tsüngda ken o tem angatetteptsü ta sangoktsü saka iba sülen ita aika süiogo, ta Tharoor-isa metetdaksü.

BJP atema 2019 nungi 2023 tashi ita asem majunger aser yamai parnoki Naga nung aser linük ashioktsür, ta paisa shisem.

BJP-i parnok indang ideology ji Constitution of India ta ashir saka BJP indang constitution nung parnok indang ideology ji Hindutva ta shia lir aser iba ya Indian Constitution nung shia mali, ta paisa ashi.

"BJP-i 2014 nungi Centre sorkar yimsü asü tenzükba nungi lintik ka, tamangba yimsü ka, oshi ka, sobaliba ka aser lenir ka ta asüba tangatetba nung inyaka arur. India nung nübo agi tangar memenepertem amaker aser tenla ki aika raksatsüogo, saka BJP sorkari item atema ola madoker. Süra kodaser parnoki Nagaland-i arur vote meshir?" ta Tharoor-isa asüngdang.

Congress-i menden 23 nung dang tokteper saka sorkar akümtsü merangba atema paisa ashiba agi "tanü putu ya teloktep putu ka lir anungji Congress nem menden peria agütsüra kasa tangatetba aliba tanga party temi yariteptsü."

"Nagaland Assembly nung tang onok MLA ka dang mali saka temelenshi, terenlok, tejakleni aotsü aser telatetba angutsü atema Congress dak dang teimla lir" ta Shashi Tharoor-isa metetdaksü.

CM Rio-i 26th Aonglenden A/C nübuyim sentong nung aden

Ungma, February 22, 2023 (TYO): 26th Aonglenden A/C nungi NDPP Candidate Sharingain Longkumer ya 13th Legislative Assembly nung tanubosang süaka speaker ka ama inyakdang kanga dang chira pera keta Assembly ktdangsuba mapa kokteta inyakdang onok kanga dang temulung asür tanü Nagaland Chief Minister Neiphiu Rio-i ashi.

"Iba mapang nung Tsüngremi dang arishia pa ya arishia doktsü nungbo constituency aser Mokochung district dang masu saka Naga nung asoshi tetemjen lenir ka asütsü tamang katetogo" ta Soyim Aonglenden, Ungma nung 26th Aonglenden A/C nungi NDPP Candidate Sharingain asoshi nübuyim sentong nung jembidang Rio-i ashi.

14 buba Nagaland Legislative Assembly election nung BJP party menden 60 prongla nung tokteptsü aji mesüra NDPP-30 aser BJP-30 ta bosa tokteptsü asoshi mapang talangka atsütepa aruogo saka 40-20 nung tembangogo, kechiaser Naga nung noklang shilem nung tokor pungo shilembo tamanger asüba agi iba nemji akhümtsüba agüja India sorkari yamaji lemsatsü ta Nagaland Chief minister-isa ashi.

Naga nung yimden ken o metembang aliba ajanga iba mapa takok ngua jembia aotsü

tangatetba nung tang 14 buba Nagaland legislative Assembly election nung NDPP-40 aser BJP-20 nung tokteptsü India sorkar-i lemteptsü ta Rio-isa shisem.

"2023 election magidang Naga nung yimden ken o ya küm 70 tashi arur iba den ano ceasefire aser yimden ken o jembia arubajia küm 26 tashi arur. NSCN(IM) den 2015 August 03 nü Framework Agreement meyonngem agia renem aser iba sülen NNPG telok den 2017 November ita Agreed Position meyonngem agia renem, anungji iba ken o tatembang kati arutetra ta asüba tangatettep nung MLA 60 prongi mulunga Opposition maliba sorkar aküm ta" Nagaland Chief Minister-isa ashi.

"Onoki bilemba amaji Election magidang Naga yimden ken o ji tatembang kati arura Party maliba sorkar yanglutsü aser yangji telung nung alirtem nübur tanishirtem aser Naga nung lenirtem adentsü asoshi renema pangjemtep, saka NNPG aser NSCN(IM) telok ana tsüngda hai haura mekatet nung iba nükjidong mataloktet" ta Rio-isa tesusaba olen ka ashi.

NSCN(IM) aser NNPG telok ana 2023 January 14 nü ajurutep saka iba mapang nungjibo election agitsü asoshi sangdonger liasü ta paisa shisem.

26th Aonglenden A/C nungi NDPP candidate Sharingain Longkumer-ia mapang tatsüka agia jembidang 2019 küm election nung adoker külen Legislative Assembly nung Speaker menden tashi maongka ngua inyakdang NDPP nükjidong FACTA NON VERBA dak ajemdaker pa akokba tashi nung merükmerüka NDPP Party, Aonglenden-sanger aser Naga nung asoshi inyakogo ta ashi.

Sharingain-isa NDPP Party, Aonglenden-sanger aser Naga nung asoshi tali awaloka inyaktsü asoshi Aonglenden-sangeri pei temeden vote-ji pa nem agijangmata mepishia ashi.

Tanu iba sentong NDPP Mokochung Region Senior Vice President Lipokzüllu ktdangsuba nung agi, sentong tenzüka Ungma Baptist Arogo Asso. Pastor Rev. M. Toshi Jamir-i sarasadem aser Ungma Village Council Chairman Nungshilepden Jamir (Tatar)-i tarur pela agizüka jembi

Sentong nungsa Star Campaigner Minister Metsübo Jamir, CEB, NDPP, Nagaland Vice President Imtiyanger Ex. MLA aser BJP Mkg. District President Imolemba Jamir nungeria shilem agia jembi aser Ungma Baptist Arogo Deacon T. Mayang Longkumer-i sarasadema tembang.

Office of the
CHUNGTIA MEDEMCHANGER PUTU MENDEN
KUKUA AITSÜR

Ozü Chungtia senso Wb. Imkongchiba Kichu, S/o Lt. Supongningsang, 22/02/2023 anogo nung meimchir yimya dak mapetba mapa agi tepsetogo. Iba mapa tamajung shirnoki inyakogo, Chungtia Medemchanger Putu-i kukua aitsür aser tatem tashi bushitsü sangdonger.

Sd/-
N. Bendang,
Chairman.

Tia takartem election duty aotsü: DC & DEO Mkg



Deputy Commissioner & District Election Officer, Mokokchung, Sashank Pratap Singh IAS ajanga Mayangnokcha Government Higher Secondary School, Mokokchung nung February 22, 2023 nü Polling Official tem den jembidang tangokba noksa nung angur.

Dimapur, Tsüklai/February 22 (TYO): Presiding officers aser 1st Polling Officials nem election training tatembangba Mayangnokcha Government Higher Secondary School, Mokokchung nung February 22, 2023 nü agia liasü.

Iba sentong nung Deputy Commissioner & District Election Officer, Mokokchung, Sashank Pratap Singh IAS ajanga mapang tatsüka agia jembidang, "Tia takartem election duty aotsü, kechiaser pei nem lemzüksüba polling station nung re-poll magira Presiding Officer nüma tangtetba mapa ka lir," ta ashi.

Vote agütsüba maparen nung timtemtsüsa technical tsütsü timtem majurutsü mechi Deputy Commissioner office nung aliba

facilitation centre semdanga mangatetjem alibatem jangjashitsü pai ketdangsür dang ashi.

General Election Observer, Prashant Kumar Panda IAS ajanga training agirtem den jembidang, Presiding Officers tem dang polling atemba sülen poll sheets nung mezülutsü saka tatalokbatem tatongi zülua alutsü aser tongtipang tatakobatem meinoksemi malitsü nenshia ashi.

Iba sentong nung General Election Observer, Kamla Kant Saroch IAS densema liasü aser paisa ketdangsür dang saksalema alitsü ashi, kechiaser mazüoktetba maparen kar ajanga re-poll agitsüsa kumra ibaji balaka saka technical nung timtem kar mechi süra ajibo

matalokdaksütsüla, ta shisem.

Iba ama tensa majurutsü mechi pei nem nungloksüba polling station bushia maodang master trainer/külem tenzüker nungi mangatetba ajak jangjatsüla mesüra facilitation centre semdangtsüla, ta pai ashi.

AEO Mokokchung, Renben Mozhui-ia ketdangsürtem dang polling mapang kanga junga inyaksü technical maparen kar indang rateta ashi.

Nodal Officer for Webcasting duty, Nyanthung, Asst. Professor FAC, Mkg ajanga ketdangsürtem dang polling anogo Webcasting inyakyim indang kar rateta ashi aser Booth App amshitsü indang yimyatem sayua liasü.

Iba sentong ya EAC (Hq), Vitolu menden süra agia liasü.

CEO Office ajanga Video yanglutepba & Essay zülutepba ayongzüker

Dimapur, Tsüklai/February 22 (TYO): Aruya aliba 14th Nagaland Legislative Assembly, 2023 asoshi General Election dak sendakba nung Systematic Voters' Education & Electoral Participation (SVEEP) sentong nung shilem ka ama Office of the Chief Electoral Officer, Nagaland ajanga Essay züluba aser Video yangluba tetoktepba

sentong ka "My Openion of Elections in Nagaland" onük nung ajemdaker ayongzüksü.

Essay nungya ojang 1500-2000 alitsüla aser video ya minute 3-5 asütsüla.

Item ya ceonagaland.itcell@gmail.com dangi February 24, 2023 nikongdang 6:00 ako tashinung yoktsüla.

Nagaland state telungzük

nung aliba school (Government/Private) ajak indang tekolakpur tem dang pei kaket reju nungi kaketshirtem iba tetoktepba nung shilem agidaktsütsü ashi.

Category shia nungi takok angurtem shimtetsü aser kuli kaket den senpet agütsütsü. Video aser Essay ajak Chief Electoral Officer indang website aser social media nung inoktsütsü.

CEO aser election ketdangsürtem Postal Ballot ajanga vote agütsüogo

Dimapur, Tsüklai/February 22 (TYO): Chief Electoral Officer, Nagaland, V. Shashank Shekhar, IAS-i pa indang vote 9 Kohima Assembly Constituency nungi postal ballot amshia DBs Court DC office, Kohima nung February 22, 2023 nü agütsüogo.

Iba election maparen nung shilem agitetba atema CEO ajanga pelaba lemsatop, koba democracy indang benjong ta ajar.

Democracy indang tangatetba shidak nung nüburtem ajaki election nung shilem agitsü imlar, ta pai ashi.

Kasa anogo pei vote agütsürtem ketdangsürtem rongnung Additional CEO, Ruokuoviltuo Khezhe; Jt. Secretary & OSDs to CEO, Hiazu Meru aser Razouvolie Dozo; Jt. CEO Awa Lorin aser ACEO R. Toshimeren Aier nungertem liasü.

Live webcasting atema 2 buba Mock drill agi



Dimapur, Tsüklai/February 22 (TYO): Live webcasting atema 2 buba Mock drill sentong State webcast control room CEO, Office Kohima nung February 21, 2023 nü agia liasü.

Nagaland nung election agitsü aliba district ajanga nung live webcasting indang mock drill ya jangjateta aliba polling station shilem 50 dak tema nung agia liasü, koba ECI/CEO/DEOs ajanga achayanga

liasü. Iba sentong ya Assistant Chief Electoral Officer R. Toshimeren Aier aser State Manager V Mukti Solution Pvt. Ltd., Sanen Longchar nati ketdangsüa liasü.

DDCF ajanga yimjungnung election agitsü ayongzüker

Dimapur, Tsüklai/February 22 (TYO): Dimapur District Citizens Forum ajanga sangdong ka nung nüburtem dang election mapang yimjung lidaktsütsü aser azüdokshi nungi pila alitsü aser democracy tangatetba shidak amshitsü ayongzüka liasü.

Election nung shilem agirtemia tim masüba mapa meinyaksü aser tajungtiba aser

democratic yimya nung election agidaktsütsü Forum ajangasa ayongzüker.

Tawa Dimapur aser temeket nung election dak sendakba timtem atalokba indang jashiba lemsatop aser DDCF ajanga nübur ajanga dang tajungtiba nung pei temeden vote agütsütsü ayongzüka liasü.

Kohima College nung capacity building workshop ayongzüker

Dimapur, Tsüklai/February 22 (TYO): Students' Counseling and Mentoring & Career Guidance Cell, Kohima College, Kohima ajanga North East Council (NEC) den lungjemer "Campus to Corporate-Advancing Northeast" nungja agütsür capacity building workshop ka February 21, 2023 nü ayongzüka liasü.

Iba sentong ya NEC, DoNER ajanga tenzüker aser NEDFi ajanga mapa kuma inyaker, koba North East region nung lanurtem nem education, employment aser entrepreneurship tsütsü lenmang sayua teyari agütsütsü nükjidong nung May 2022 nung tenzüka liasü.

Iba sentong ya Kohima College, Kohima nung BA aser B.Com 6th Semester azünger kaketshir asoshi ayongzüka liasü. Workshop ya session ana lemsar agi, kong shisalen sayur Nishie Agarwal Learning & Development Specialist aser Chandni Shivam, Junior Consultant liasü.

Iba sentong nung menden Temjenrenla Asst. Prof, Dept. of English liasü aser Diesino Soho, Asst. Prof, Department of Economics ajanga melepzüng o jembi.

Commerce Department nungi Assistant Professors, Ngiplon Rachel Chohwanglim aser Akono Phira nati iba workshop nung record asü.

Ni kilir kümer Angetyongpang nübur tenzükner : Wb.S.Maongkaba Ozükum-i, NPP Candidate



Mongsenyimti yimtak tanü 24th Angetyongpang A/C nung National People's Party Candidate Wb.S.Maongkaba Ozükum-i aliba pa election nung noktakba sangdongba sentong nung jembidang tangokba noksa.

Mongsenyimti, Tsüklai/February 22 (TYO) : Mongsenyimti yimtak tanu 24th Angetyongpang A/C nung National People's Party Candidate Wb.S.Maongkaba Ozükum-i 24th Angetyongpang A/C nung aliba pa election nung noktakba sangdongba den nüburtem den ajurutepa pa election nung toktepba nükjidong lemsatopba sentong agia jajaogo.

Ni Angetyongpang kilir kümer Angetyongpang nübur tenzükner, anungji nenoki nenok senti vote-ji kü nem aguja maongka agujangmata National People's Party Candidate Wb.S.Maongkaba Ozükum-i adenshia aliba 24th Angetyongpang A/C nüburtem dang ashi. Tang putu nung nübur tajakleni anitsü aser alima terenlok leni anitsü India Sorkari schemes aika renema lir, anungji ni dang adokra item schemes-temji bener arua nüburtem yaritsü tejangraba lirta paisa shisem.

Maongkaba-isa lanurtem aika zünger mapa mangurtem lir, parnokji NPSC ama coaching agidaktsü mapa ngudakja nüchi tia nung anitetsü mangdang lir, iba den ano tantsür tamburtem

atema pension teyari ngua alitsü asoshi lenmang sadema lapoka alinung itemji bener aruagi tantsür tamburtemji yaritsü mangdang lirta metetdakja ashi.

Tanu iba sentong nung National People's Party State President Dr. Andrew Aphoto Sema, taoba 24th Angetyongpang A/C nungi Ex. Candidate Wb.Sashimar aser NPP state Secretary IPR & Media Wb.Imnameren parnokia shilem agia jembiba den sentong Wb.Odinungsang-i ketdangsüba nung agi aser sentong nung Tsüngrem leniba jazüka Mongsenyimti Baptist Arogo Music Director Imotemjen-i sarasadem aser tatem nung Wapangtula-i sarasadema tembang.

Tanü Mongsenyimti nung iba sentong agiba osang angazüka Mokokchung nungi Osang Zülur osang agitsü asoshi Mongsenyimti-i aludang Mongsenyimti nung Mongsenyimtisürtemi osang zülurtem gari soita gari tema telung ajak mita repringba den osang zülurtem temanga mita repang. Osang Zülurtemi onok ya osang zülurtem tanu sentong agitsüba alurta shiaka mangai gari aser temang mita repang.



February 22, 2023 nü New Delhi nung Ato kilonser, Narendra Modi aser Asian Development Bank Tir, Masatsugu Asakawa na senden amendang tangokba noksa nung angur.

State ajak dang küm 6 tanurtem ang class 1 nung admission agitsü tuyur

New Delhi, Tsüklai/February 22 (Agencies): Ministry of Education-i states aser Union Territories ajak dang arrshi küm 6 aser tempur tanurtem ang class 1 nung admission agidaktsüsü tuyuogo, ta Bodhbarnü ketdangsertemi metetdaktsü.

National Education Policy (NEP) kübok arrshi küm 3 nungi 8 tanur ajak nem angazüktsü atema maongka agütsütsüsü aser item küm 5 ji foundational stage asütsü metetdakja lir; iba nungji küm asem preschool education densema lir, iba sülen Class 1 aser 2 asütsü.

"Iba policy ajanga pre-school nungi class 2 tashi nung tanurtem kanga junga

angazükba aser renlokba jenjang ajungkettsür. Anganwadis mesüra sorkar school, sorkari yariba school, private school aser melungtet teloktemi ketdangsuba pre-school centers nung küm asem tashi tanurtem nem pre-school education tajung agütsü nung ang iba ya ataloktsü," ta Ministry of Education nungi tongti ketdangser kati metetdaktsü.

"Ministry-i state sorkartem aser Union Territories nung administrations dang tanurtem arrshi küm den putepa class 1 nung admission agitsü atema tajemba agia arrshi küm 6 aser tempurtem asütsü tuyuogo," ta ketdangserisa metetdaktsü.

Yaküm Supreme Court-i, tanurtem kanga tila asüdangyongi school-i meyoktsüla, kechiyong ibaji ajanga parnok shi aser shisatsü tsütsü health kongshitsü, ta metetdakja liasü.

Education ministry-isa state tem dang pepei tesem nung küm ana preschool education (DPSE) course design süa agitsü ajungshiogo.

"Iba course ji State Council of Educational Research and Training (SCERT)-i design asütsü aser SCERTs ketdangsuba kübok District Institute of Education and Training (DIETs)-i benoktsü," ta paisa metetdaktsü.

India-i Pakistan linük nem teyari magütsütsüa akok: S Jaishankar

New Delhi, Tsüklai/February 22 (Agencies): Tang Pakistan nung rongsenketzüng tsütsü timtem tulu adoka aliba mapang ka nung India external affairs minister, S Jaishankar-i, India-i Pakistan linük nem teyari magütsütsüa akok, ta metetdaktsü.

Interview ka nung jembidang Jaishankar-i, India-i anüolen aliba kidanger linük (Pakistan) ya Sri Lanka den kasa mezüngshir, ta metetdaktsü.

Tang Pakistan linük nung rongsenketzüng jenjang kanga mejungi aliba aser security tensa majungba dak sendakba nung

Jaishankar-i, Pakistan-i ajangshiba tiaji parnoki inyakba aser telemetba agiba dak keta lir, ta ashi.

Linük shingaia ajungbena tensa tamajung majurur, ta pai ashi.

India-i Pakistan yaritsü asü?, ta asüngdangba langzüdang Jaishankar-i, tanü India-Pakistan tsüngda tesendaktepji katii ka yaritsüsa masü, ta ashi.

Ajisüaka Sri Lanka atemabo linüki tajungtiba inyaksü akok, ta pai ashi.

Sri Lanka nung rongsenketzüng tsütsü timtem tulu adokba mapang nung India-i Sri Lanka nem chiyungtsü,

mozü aser totzü agütsüba den külemi sen-a aputsüogo.

India kidanger tanga linüktem den

Pakistan medemdanga Jaishankar-i, tensa tamajungba mapang nung India-i tanga linüktembo yaritsü melunga lir, ta ashi.

"Iba linük nung nüburtemi Pakistan indang koma bilemerar nai meteta dang lir," ta pai ashi.

India aser Ukraine nati Ukraine nung yimjung asalentong atema jembid

Kyiv/New Delhi, February 22 (Agencies): Ukraine Tir office nung tongti, Andriy Yermak aser India Ato kilonser atema National Security Advisor (NSA), Ajit Kumar Doval nati Ukrainian Peace Plan atema o lemtepogo; Ukraine nung rara anentsü atema Peace Plan ya onük 10 aliba Peace Formula ka lir.

Yermak-i, Ukraine-i maneni tongbang nung nokdakdar, ajisüaka onoki yimjung atema asalentong ka benokogo, ta metetdaktsü.

UN Charter pusema bangzüng renema lir, aser iba bangzüngji Ukrainian Peace Formula tamendakdak lir. February 23 nü UN General Assembly nung ibaji benoktsü, ta Ukraine Tir, Volodymyr Zelenskyy indang official website nung shia lir.

Phone ajanga Ajit Kumar Doval den jembidang Yermak-i, "India den amalitepji onok atema kanga tongtibang. Nenoki-a onok indang bangzüng pusemsü onoki imlar, kechiyong iba bangzüng nungji arrtsü aser litsü akhümket wazüka ayutsü atema olong shidak amshia lir.

Onok nükjidongji kanga teladak aser tejangja. Onoki Russia nunger litsü centimetre kata onok meyong ta mashir, saka onok litsü meyipa aginer," ta ashi.


Ukraine nung tang rara aliba tesemtem, talisa Donetsk region kübok Bakhmut yimti nung rara metetdakja Yermak-i, "Russia-i rara asalentong tasen yangludat aser onokia meyiptsütsü atema renemdar. Russia nunger army tem dak temelungtetba mali saka Ukraine nunger sepaitembo kanga tasü tait. Onok meyong litsü meyipa magi tashi onoki maneni raratsü. Onoki raraba hadir dang nüngdaker," ta ashi.

Yermak-i, iba rara anentsü aser ozü linük litsü akhümket tanaben angutsü atema inyakba inyakyim ajak Ukraine-i pelaa agizüktsü, ajisüaka ibaji khenpiga atema rara anenba masütsüla saka Russia nunger sepai ajak Ukraine litsü nungi aienshitsu, ta metetdaktsü.

"Takümsa iba rara anentsü ta onoki amanger, aser ibaji onok puti otsü nung mezüng tongbang tulutiba aser tatembangbuba asütsü," ta Andriy Yermak.



February 22, 2023 nü Ranchi nung Jharkhand Jaguars 15buba Raising Day anogomong sentong nung Jaguars seapitemi shilem agiba noksa nung angur.



February 22, 2023 nü New Delhi nung External Affairs Minister, S Jaishankar aser UAE Minister of Industry & Advanced Technology, Dr. Sultan Al Jaber na senden amendang tangokba noksa nung angur. Dr. Sultan ya COP 28 Tir shima lir.

Canara Bank SALE NOTICE DIMAPUR-II BRANCH. Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 nung Rules 8(6) kübok E-auction ajanga kiojen ayoktsü Notice. Public aser talisa sen apur (tem) aser Guarantor(s) dang, Secured Creditor dang mortgage asüba tsünglanglen shia aliba kiojenji Canara Bank nung Authorised Officer-i agiadokogo, aser ibaji Branch of Canara Bank-i sen apur aser Guarantor sentsüh aotsü atema 28.03.2023 anogo nung "Yangji aliba" aser "yangji aliba ajak" yokdoktsü, ta sangdonger. Earnest Money Deposit (EMD) ji 27.03.2023 nikongdang 4:00 ako tashi nung mesüra ibaji matongdang deposit asütsü. Auction ji website: http://indianbankseaction.com ajanga "Online E-auctioning" asütsü. Auction asüba Anogo aser Mapang: 28.03.2023 nü anepdang 11:00 nungi nikongdang 01:00 ako tashi. (Iba sale metembang tashi mapang shia minute 5 atsülangtsü). Branch, borrower/guarantor, liability, kiojen osang aser EMD, reserve price osang tejangja:



TIR YIMYIM YIMOBILEM (EDITORIAL)

DIMAPUR YANGTEPNÜ, TSÜKLAI (FEBRUARY) 23, 2022

Ao kin kolak angüma matutet kümogo

Nagaland nung election-a Ao lima Mokochung district nungang alir ama yimtak yimer o yimer na azü tokshia raratepba agi tenük masüng, ano tesem kar nungbo nisung tepset tenzükogo. Aor MLA ka shimtsü atema Aortem alima tsüngdang tokolaka angüma matutettsüsa yamai inyaksü na? Ya shitakba pioneer kin na? Asenok ya election nung sen crore ter metsü endoka MLA akümba nung pioneer asü? Mesüra nisung kar lemtaa yutsür mesüra tepseta yutsür külen MLA akümba nunga pioneer? Mesüra election mapang yimer o yimer na süng long aser injang dena amshia taochi maka raratepba nung pionner-a na? MLA ya Aori tekümnüba asü? Aorbo nisung nisung kar lemtaa yutsür mesüra tepseta yutsür MLA akümbaji akhi limapur mapang mangkoterongi atu ama bilemer asü? Nisung kar dak züker aser kar tepseta yutsür MLA akümba nungji kechi jangratem aser konang ali? Kechi ka inyaksü tebilemba nung Aortem rongnung MLA inyaksü yamai azüa tokshia rakteper? Asenok mapa agi asenok ya tamangpet aser tesayupet amangba purtema ta jangjar. Iba amai lia asenok dangi Mojing arur, "ni nenok Aor nem Naga nunger madak yimsü asütsü asoshi yimten tashi ajak agütsüdi, ni khen külemang," ta ashinunga, asenokibo pelashishia anabena külemtsü südi. Kodang nungi kodaser asenok Aortem yamai rongsen aser yimten tashi penbua aküm? Asenoki memetet asenok dang nungi Tsüngrem tanüla piladok asü? Asenoki asen lima nung election kanga junga aginer saka magitetter, kechiyong asen jakla aser mapa agi asen alidak election junga agitettsüla masü. Nüngdakra asenokibo Tsüngrem nem agütsüba tenla sen agi dena election nung vote alitsü matidaktsüsa asenok mulungjang nung mojing aidakokogo. Atangji, asenok mulungjang nung temeim aser ochi mali, anungji taochi mali tiyazü jembir aser taochi mali nübor temyong rongsen auyar aser nübor temia taochi mali candidate-tem dang sen meshir. Iba amai sen crore ter metsü endoka azü tokshia mapa inyaker külen akümba MLA dak nungi nübor temi kechi tajung imlar aser candidate-tema kechi inyaksü nükjidong nung election-i aier? Atangji, asen lima nung election mapang tashiyim aser sen amshiba aser azü tokshia raratepba ya tanü tasen masü, joko Aor putu ka dak tali asenok tashiyim aser ochimashi nem yimsü sūdaksür. Aji oda, asenoki tashiyim aser ochimashi agi MLA menden raktep tenzüküer külen asenoki meteta asenok tokolak agi teben kümogo aser yimten yimsüsüba senmang aser temoatsü asenok dak nungi agienogo. Tang yabo asenoki tangar dak tenük meremer dang ashi, asenok tangar tsüngdang tokolak angüma matutettsüsa asenok maksü benshiba mapang ka lir. Asen tsüraburtemi Tsüngrem temeim meteta Tsüngrem mapa inyaka jajaba agi asenok Naga yimten nung talangka merenogo. Ajisüaka, Tsüngremi asenok nem Naga yimten yimli agütsü nung asenoki yi jema seplep, nüktapangta benshi, senotsü amshiba nung ochimashitsü tenzük, tashiyim agi akoktsü merang, asenok mapa agi, tetsübuttsüka, Nagaland rakzükramer agi asüng, asenok pei kidanga tsübuseta ali, Mokochung nungi Kohima aser Dimapur leni aotsübaji tetsübuttsüka liasü. Government sen ajak taila aser tiyazü subsidy yanglua agi aser tanga aji manener. Item kin denji Tsüngrem tanüla pelaa alitsü na? Saul dak nungi Tsüngrem tanüla pilar alitsü südi. Atangji nung, shibaibo nisung tepsetnua ali? Aser shibaibo tashiyim inyaknua ali? Itemji asenok dak aliba mojingi inyaker. Pi kintem repringang, tagitsü yimten onük jembia election agir, anungji election temer külena assembly nung tagitsü o jembir. Tesasatsüka aser taaktsüka, Ao kin shisalen sayurtem to shisa ramar pi tsüngdang ola madoktetsüsa kümogo. Ya tapi agi masü. Ibai Tsüngremi Aor metongshitsüba mapang lir. Asenokbo MLA menden melen Tsüngrem dang taochi meshia sarasademba kin tanü tiyazü kümogo. Ya asenoki Tsüngrem temeim amadoker tiyazü agi rongsen aser tashiyim agi yimten tashi bushiba nungi tenzükba lir. Joko asenok arogoa aser yimtena Tsüngrem dang taidok aser taochi meshir khen jungjunga tenzükshitsüsa kümogo.

OLEMSABANG

CLEAN ELECTION NUNG TAMANGER KASHILEM

- Dr. R. Zulu Jamir, Kumlong Baptist Arogo

Okila:

Tanü election asen atep nung tonga aruogo. Shiba nem ni kü senti vote agütsütsü, mesüra kechi atema kü senti vote agütsütsü ta arok- aroka shisadangtsü tensa kati Naga senso nüburtem menepogo. Tesüiba mapang amangbapuri shimba lenirtemi tanü Naga nübur ya tashi anir aruogo. Tanü maneni asenoki shimba lenirtemji asüng asen lima ramoka yimsüsürtem alitsü. Nüburtemi tanü shimtetba lenirtem yagi asüng Naga senso nübur ajak asoshi telemtetba agitsüsa akümtsü. Anungji aseni shimtetba lenirji asen taküm, kibong, lokti aser nübur ajak asoshi kangasa tongtibang lir.

Tanü Naga lima kechi tia aser jenjang ka nung nokdaka lir, ya ajaki kanga süoki yia bilemdangtsü nungdaker. 1945 küm America nungeri teprangtsü nung asenok mesükba shilo Japan nunger lima Hiroshima aser Nagasaki yimti Atom bomb agi alima ajunga achasa poksatsü. Japan lima teimla makaba jenjang ka nung parnok lenirtemi nüburtem ayongtena anak-awi aser asentsü agi melanger meranga inyakba yong tanübo Japan lima medical science aser technology tsütsü western limaia memener. Asen Naga nungera statehood 1963 küm ngur sorkar lenisüba melentepba küm 60 tashi jajayonga arudang tanü asen alima koba tashi nung renloka arua lir.

Tanü asenoki shimtetba lenirtem ajanga asen nüburtem rongnung; sensaker, aluyimer, kaketshir, shishilembar aser alima renloka aoba mapa nung tongtipang kisürtem alitsü. Asen nübur sobaliba, tamangbaren, kishi kinar den tesendaktep, nüburtem kümzüka ayuba, rongsen ketsüng aser Naga nunger senso temeden asenoki shimtetba item lenirtemi khuret benzüktsü. Tanü naga senso nüburtem rangben asoshi tebilemstü aser khuret ajak benzüka aotsüba lenirtemji kangasa sarasadema nüburtemi shimtsü nüngdaker. Asen tendak nüburtem asoshi item teinyaktsü ya rongdak nüngdak ama bilemer.

*Nüngdak Ka: Alima kaji lenmang ajungba ajanga renloka aoba meteter. Tanü Naga lima nung tongtibang lenmang aisü awi agi pongpanger arem küma aoba angur. Item lenmangtem junga anepalutsü kangasa nüngdaker.

*Nüngdak Ana: Tanü putu tensa nung lanur degree balala ngur alirtem asoshi governmenti mapasa magütsüyonga skill development training agüja self employment atema project balala lapokba taküm aser kibong mesütsü atema lenmang sayutsüla.

*Nüngdak Asem: Asen lima nung temang anepaluba health care tajunga kanga nüngdaka lir. Pi lima nungbo government hospital ya nüburtem asoshi temang anepaluba tesem tajungtiba küma yanglua lir. Tesüba küm ka ana tejaklen Covid-19 tensa nung asen Naga nunger temang anepaluba terenemshiba tajung maliba ajanga nüburtem kangasa timtemtepogo. Sorkari tanü putu tensa den apet asen lima nunga mozü ki shia nung infrastructure aser facilities tajung peria anepalutsüla.

*Nüngdak Pezü: Naga lima ya ayong aikati meketpanga aliba tesem ka lir. Town balala nung tsüngküm tepiyong tzü alia jemteper. Kibong shia nung tzü piplinebo inoka billbo agütsür, saka tzübo marur. Sokari item tebilemstü ya telungi yia khen repringtsü kanga nüngdaka lir.

*Nüngdak Pungu: India lima state ajunga nung tarutsü putu lanurtem asoshi universities tajung aika amenoka lir. Tanü asen lima nunga branches ajak züngtettsüsa institution tajung ka dang masü saka aika nüngdaka lir. Kodang sorkari Naga lima ya educational center ka küma yangludir, idaki kaketshir asoshi masü saka tsürapur aser sorkar asoshi rongsen ketsüng nung tajangzük tulu alitsü.

*Nüngdak Trok: Asen lima ya farming aser agriculture nung tejakleni aotsü lenmang sadema lir. Lenirtemi nüburtem asoshi sentong ayonga Naga nunger meranga inyaker chiyungtsü leman sayutsüla. Nüngdakra item maparen asoshi rongsen indok mesasai tesem balala nung tanü tensa nung aluyimertem asoshi facilities agüja parnok jenjang ajungketsütsü nüngdaker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tsüngremer mapang ka nung 'Jesus Revolution' sayar: Jon Erwin



Los Angeles, February 22, 2023 (Agencies): 2015 kum Jon Erwin-i mezüng "Jesus Revolution" film yanglutsü apitetba mapang nung iba film ya tang US nung revival tulu aliba mapang ka nung sayatsü, ta memeteti liasü.

Jesus Revolution film ya America nung puti otsü nung revival tulutiba adokba otsü nung ajemdaker yanglu, aser tang US tesem aika nung University campus aika nunga revival milak jangrua prokshiba mapang ka nung film tasenba sayatsü.

Osangbener den jembidang Jesus Revolution Director, Jon Erwin-i, "Küm aika onoki iba film otsü yanglua liasü. Onoki iba film renemtsü mapang nung coronavirus wara tenzüka liasü," ta ashi.

Tang University aika nung revival milak jangrua mapang ka nung akhidang US nung revival tulu adokba indang film sayaba dak sendakba nung pai, "Iba film sayaba tensa mapang ya Tsüngremer sentong liasü ta ni bilemer. Onoki iba film yangluba tetezü- ahkidang iba ya (revival) atalokra tang-a ataloktsü akok. Akhidang ataloka lira ano ataloktsü akok," ta ashi.

Jon Erwin ya Nashville, Tennessee nung alir aser tawa Nashville anasa aliba Wilmore, Kentucky nung aliba Khristan college ka- Asbury University nung revival tulu adoka liasü.

Asbury University nung chapel agiba sülen nisung karbo mesenshii maneni sarasadema liasü aser iba mapang nungji revival tulu adoka anasa aliba university aika nung revival milakji prokshidar.

"1970s nunga yamai ataloka liasü aser ibaji 'Jesus Movement' tuluka liasü," ta Erwin-i ashi.

Erwin aser pa kinüngtsü nata Asbury tashi tsüngdong oa revival nungji kuli süa denogo.

"Iba (Asbury University revival) ya film nung aliba scenes ama dang lir, kanga mesükteper. Ibayongji onoki iba film ya yanglu. Iba ya asüngsashiba mapang ka aser

asentenshiba mapang ka liasü. Takdang nung nai ibaji meteta akümtsü. College azüngertemi par putu, par mapang aser Tsüngremer inyakba kuli asüandang item ajakji ajanga ni ajungmeso. Teimla kaji- item ama milak yabo prokshidaksüner. Ibayongji onoki iba film yanglu," ta pai metetdaksü.

"Onok ya pastor tem mesüra yimtenren lenirtem masü saka entertainers lir. Ibayongji onoki akhidang America nung rongnung atalokba otsü nung ajemdaker film adoka nisungtem nem reprangdaksüba ajanga 'iba ya ano ataloktsü akok; asen putu mapang nunga ataloktsü' ta teimla kadaktsüner. Iba kuli teimla," ta pai metetdaksü.

"Jesus Revolution" filmotsü nung, 1970s mapang Greg Laurie den lanur kari West Coast nung ochi aser taküm nung chichiba tetezü bushi tenzüker. Iba mapang nungji Greg Laurie-i lanur evangelist, Lonnie Frisbee ajurur. Sayatsüngir jagi pa den Yisu Khrista osangtajung lemsateper aser lanurtem dang Tenla kidangi arutsü ajungshir.

Erwin-i, "Iba film ya khenyongi balaka. Lionsgate-i onok dang film nungjaji 'Jesus Revolution' süang ta ashibaji tesüngmangtsüka lir," ta ashi.

Iba film ya February 24 nü theatres nung sayatsü.

Film nung Kelsey Grammer-i Pastor Chuck Smith shilem agir, Joel Courtney-i Greg Laurie aser Jonathan Roumie-i Lonnie Frisbee shilem agir.

Laurie ya Harvest Christian Fellowship nung tongti lenir aser osangbenertem den jembidang pai, pai 1960s aser 1970s nung ajangshiba tensa mapang den tang ya khenyongi balaka, kechiyong tang putu nungbo lanurtemi tejashi ajurur, mental health tsütsü timtemer aser taküm nung telangzüba bushir, ta metetdaksü.

"Asen putu mapang nung lanurtemi nungdakba ama tan putu nung lanurtemia teimla nungdaker. Iba film ajanga

lanurtem ajungmesotsü, ta ni imlar. Onoki iba film ajanga shidakba atalokba revival otsü ashir aser iba film ajanga lanurtem ajungmesotsü atema onoki sarasademer," ta pai metetdaksü.

"Jesus Revolution" otsü nung pastor, Chuck Smith-i evangelism tsütsü Frisbee indang tangatetba agizüker aser tezülen senzüba lanurtem atema Tenla ki kishi lapoktsür.

"Chuck Smith ya lendonga metsübuba nisung ka. Lanurtem mashi lenmang nung jajabaji pai meteta liasü. Pastor ka ama asenoki lanurtem den tesendaktep yanglutsüla aser lanurtem nem maangka agütsütsü nungdaker," ta pai ashi.

"Iba film ya tetemsü nisungtem indang masü saka tetemsü Tsüngrem kati metemsüba nisungtem matsüngdang mapa inyakba otsü lir. Ibayongji onoki iba film dang 'Jesus Revolution' ta ajar. Iba ya Yisu indang film lir," ta pai ashi.

Arogo lenirtemi pei mapa nung tamakok anguba dak sendakba nung Erwin-i, iba film ya pastor tem atema tayongzüka ka asütsü aser loktilibai sendokba lanurtem nem Tenla ki kishi lapoktsütsü atema ajungshiba film asütsü, ta metetdaksü.

Film yanglurtemi US tesem balala nung pastor tem dang "Jesus Revolution" film ya sayuogo, aser parnok aikati pelaa agizükogo, ta Erwin-i ashi.

Laurie-i Khristantem dang Tsüngrem dak mamangertemi theaters-i anir oa iba film reprangdaksütsü ayongzüker.

"Pastor tem, ner santem dang mamangertema theater-i anir oa iba film r e p r a n g d a k t s ü t s ü ajungshiangma. Ticket ana aliang, na asoshi ka aser mamaner ka atema ka aliang. Parnok iba film reprangi anir oang, ibaji ajanga Tsüngrem dak mamangertem Khrista dangi aruba nai angutsü ta ajungshiang," ta Erwin-isa ayongzüker.

ANO GO ABEN TSÜNGREM DEN

Mokozü aser nirep ama

- T. Ken 68:1-6

Nisung kaji pa/la medemeri dang masü saka pa/la tsükchirtemia metetter ta ashir. Kibuba Yisua tsükchirtem liasü. Davida tsükchirtem liasü. Ajak shirnoki shidakba asoshi noktaker tsükchirtem alitsü. Saka item tsükchirtemji kechi mesüka alitsü metettang- " mokozü aridokba ama alitsü" (t.2). Shibai mokozü tsübur? Iba yagi asenok lungbangtsü akok, saka asenoki mopung temerük aitdaksüra- Tanela Temeshi mopung - iba yagi asenok melungbangtsü mesüra makutsü. Dawidi ano iba nirep den medemdanger(t.2). Temo milen arungbaji Tsüngremer tsükchir madak kechi ataloktsü iba noksaji lir. Mokozüji yakta dang süshia oadoker, aser nirepji yakta yimsa aor. Takokji Tsüngremeri angutsü.

"Anungji tamajungerji Tsüngrem Tsüngdang samadakjang. Saka temeshi pur peladakjang. Tsüngrem tsüngdang parnok washidakjang" (t 2,3). Kechiba? Tsüngremeri asenok asoshi inyakba nung. "Tsüngrem dang ken tenang, pa nüngsang ken tenang;shibai azüngmeyakdak ajanga sanger aor Pa asoshi lemanng adokdakjang"(t.4).Tsüngremerji takoker tulu lir, anüngtem nung asanger.

Pa " tebu malir tebu ka lir" (t.5). Asenok koba nung yirua lir shidak jagi arur aser temulungjang teraksa anebtsür. Ano, Tsüngrem o bendanger aser talangzüker lir. Temenen yinzü agi alena lir Pai nüji kümdaktsür.

Na ne tsükchirtemi ajemrepa lir ta bilemer asü? Khuretji Tsüngrem tsüngdang yujang, aser Pa nü Takoker kümdakjang.

Gujarat nung Khristan school kati police dang security meshir

February 22, 2023: Gujarat khenyongi magizükteter, state nung aliba Khristan school kechiyong asenok ya ka nung Hindu yimsü alia democratic linük ka nung alir," amangertem telok kati anogo ka piyong timtem agüja class takdang aser principal office nung Hindu nung tsüngremertem noksa yuang, ta takhangba agütsüba sülen school ketdangsertemi sorkar dang police security agüjang ta mepishiogo.

February 20, 2023 nü Gujarat Education Board of Catholic Institutions secretary, putir Teles Fernandes-i shidi ka ajanga Gujarat Chief Minister, Bhupendra Patel dang Amreli jila nung aliba St Mary's High Secondary School nem security agüjang aser aibelenertem anema inyakang, ta takhangba agütsüiogo.

"Item ama mapa tamajung inyakertem nem temerenshi agüjang ta onoki akhangba den külemi tarutsü nung onok institutions nung timtem madoktsü atema police security agüjang ta onoki mepishir," ta CM dangi züluba shidi nungji shia lir.

February 22 nü osangbener den jembidang Fernandes-i, "Item ama takhangba (school nung Hindu nung tsüngremertem noksa ayutsü) ya

Vishwa Hindu Parishad (World Hindu Council) züngsemtem aser VHP youth wing, Bajrang Dal nungi züngsemtem February school campus telungi aiter class takdang ajak nung aser principal office nung Saraswati Bharat Mata aser Hanuman ama Hindu nung tsüngremertem noksa yuang, ta takhangba agüja liasü.

"Parnok anepdang 10:00 ako meta school campus tonga aru aser nikongdang 5:00 ako nung ang meyipa ao," ta school principal, putir Binu Kunnel-i metetdaksü.

Parnokisa, school ketdangsertemi Hanuman noksa ka shisatsüiogo, ta tiyazü nung tai tonglokja liasü, ta principal-i metetdaksü.

"Right-wing organizations densema telok shingaiia onok nem kodanga timtem agüja maru," ta paisa shisem.

Khristan school tem tenüng menüktsütsü atema kasa jila nung nija school ka anema-a inyaktsüa akok ta school ketdangsertemi melung melemi bilemer.

AO OSHI ANGAZÜKDAK:

TANÜ ANGAZÜKTSÜBA OJANG

Ozüngsüa

(n) inyaktsübasa (mandatory)

* Kibong ajaki kilen sarubo ozüngsüa agütsütsüla.

Ozünok

(n) onok, ozü telok (we, us)

* Parnoki ozünok dang kanga meim.



OLONG PAITEP # 6437

Grid for crossword puzzle #6437 with numbers 1-16.

TIPIEN

- 2. Auo nung chiyongsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A _ _ _ g
6. Mopung apodoka
9. Tongtipang tagitsü
10. Menungra bilem
11. Aiür
13. S _ _ _ k
14. T _ _ _ r

OLONG PAITEP # 6436 TELANGZÜBA

TIPIEN :

- 1. Yiar, 3. Tesola, 7. Yimra, 8. Tangar, 9. Peria, 10. Tanur, 11. Tasen, 13. Lemjem, 15. Tambu, 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner, 5. Alaka, 6. Satan, 9. Putet, 10. Tembar, 11. Tatok, 12. Amang, 14. Jala.



Gentleman ka Alokbar dokan nung tetong nem jacket ka alitsü, koba anga meshimtet nung dokan kibur, Alokba dang asüngdang :

Gentleman: Hai kibur, ni kütong nem jacket ka alitsüner nung kobaanga meshimtet aja, naia netong nem alitsünung koba shimtetla?

Alokba : Ayaya, nibo bullet proof jacket ang ka alitsüla, ni kübutsü lirji to, tatila mahani!

Lilir : WhatsApp

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela Tasoba Anogo



Sushri Anusuiya Uikey-i Manipur Governor inyaktsü tenzükogo



Imphal, February 22, 2023

(Agencies): February 22, 2023 nü Manipur High Court indang acting chief justice Justice M.V. Muralidaran-i Manipur governor Sushri Anusuiya Uikey nem tezüngzüktep agidaksüogo.

Iba sentong nung Manipur chief minister N Biren Singh, cabinet minister tem, Manipur Legislative Assembly Speaker Th Satyabrata Singh, Rajya Sabha MP Sanajaoba Leishemba, MLA tem, Chief Secretary, DGP aser paramilitary forces

ketdangsürtem aden.

Manipur state tajungtiba atema inyaktsü aser terenlok mapa aika bener arutsü ta Governor Sushri Anusuiya Uikey-i ashi.

Laisa Manipur Governor inyaktsü maongka anguba atema India President Droupadi Murmu aser Prime Minister Narendra Modi na dang pelaba metetdaksü.

Sushri Anusuiya Uikey-i governor La Ganesan melenzüker. La Ganesan-i Nagaland Governor inyaktsü

tenzükogo.

Tezüngzüktep agiba sülen Uikey-i INA Museum aser INA HQ, Moirang semdang aser Netaji Subhas Chandra Bose nem tetushi agütsü.

Iba sülen lai Sendra, Loktak Lake semdang aser idanggi Loktak Development Authority chairman M. Asnikumar Singh-i la pelaa agizük.

Sushri Uikey ya Manipur nung Governor 18 buba lir. Lai July 16, 2019 nungi February 12, 2022 tashi Chhattisgarh Governor inyakogoo.

BJP-i nübortem temeyoktepmaginür: Rahul Gandhi

Shillong, February 22, 2023 (Agencies): Bharatiya Janata Party (BJP)-i kin temeyoktepmaginür anunggi Congress-i nübortem kümzüksü ta Congress lennir Rahul Gandhi-i ashi.

Meghalaya Assembly elections atema Shillong nung lokti sentong ka nung jembidang Rahul-i iba ya ashi.

"BJP aser Rashtriya Swayamsevak Sangh (RSS)

ajanga Meghalaya nung oshitem aser sobaliba raksatsür" ta Rahul-i ashi.

"BJP-i ki temeyoktepmaginür anema noktaker aser nenok sobaliba, inyaksangshi aser oshi samatsütsü meranger. Congress-i nenok ajak BJP nungi kümzüksü" ta pai ashi.

Prime Minister Narendra Modi-i bendang linük sema senzüdang Gautam Adani-i dang tajanzük angu ta

Rahul-isa Modi aser Adani aija jembi.

"Prime Minister-i Bangladesh, Sri Lanka aser tanga linüktem sema senzüdang Gautam Adani-i tajanzük angu" ta pai ashi.

Meghalaya nung sorkar akümtsü tashi ngura uninterrupted power supply agütsütsü. Ano drugs achirtem onoki yaritsü, ta Rahul-isa metetdaksü.

Tura nung PM'er rally ken o nung state sorkar shilem mali: CM Conrad

Shillong, February 22, 2023 (Agencies): Tura nung aliba PA Sangma Sports Complex nung Prime Minister Narendra Modi'er election rally agitsü memelaba nung pa mesüra par party shilem kecha mali ta Meghalaya Chief Minister Conrad K Sangma-i metetdaksü.

"Temelaba ajak Election Commission of India nungi arur. Anunggi iba nung NPP mesüra kü shilem kecha mali" ta pai ashi.

Sports department-i West Garo Hills district ketdangsürtem dang iba tesem nung ki mapa

inyakdang aluba jana aika lir anunggi PM'er rally atema temelaba magütsütettsü ta ashi.

February 27 assembly election jandang taoba ita BJP-i NPP den tesentaktep pilaogo aser parnoki iba atema NPP aitsür.

BJP-i aitsüba ya tiyazü kechiyong ibala rally atema temelabaji Election Commission ajanga agütsür aser iba nung district administration shilem lir. Election mapang yamai ajurur saka BJP-i ken o tulu ka kümduksüogo, ta CM Conrad-i ashi.

Iba stadium ya shilem ana lir. Mezüngbubaji football stadium lir aser iba yabo lapokogo. Tanga shilem nunggi indoor stadium aser swimming pool ka lir aser ibaji ano merenem" ta pai metetdaksü.

"PM Modi indang sentong nung nisung aika senteper, anunggi district administration-i nisung aika arura natural turf raksatsü ta bilemer asütsü akok. Ano idakji parking facility mali" ta paisa shisem.

Tura nung PA Sangma Sports Complex ya December 16, 2022 nü lapoka liasü.

Meghalaya nung bendanger nem CAA aser NRC mebenokdaksütsü: Mamata Banerjee

Shillong, February 22, 2023 (Agencies): Bodbarnü Trinamool Congress (TMC) tanishir aser West Bengal chief minister Mamata Banerjee-i Garo Hills region nung lokti sentong tulu ka nung o jembi.

West Garo Hills district kübok Rajabala nung agiba sentong nung nisung aika aden.

Meghalaya nung dak CAA aser NRC benokertem marudaksütsü ta Mamata-i BJP

aija jembi.

"Nenek madak CAA aser NRC tebenokdaksü" ta lai ayongzük.

Meghalaya nung temelenshi bener arutsü aser tejakleni aotsü atema TMC nem vote enokjang ta Mamata-isa mepishia metetdaksü.

"NPP-i aniba Meghalaya Democratic Alliance (MDA) nung ochimashi ken o aika adoka lir. Healthcare nungi lenmang majung

tia lir aser parnoki Meghalaya nungertimtemdaksür" ta lai ashi.

"Meghalaya nungeri Delhi mesüra Guwahati nung kibur tenzükertem meshimtsüla" ta TMC national general secretary Abhishek Banerjee-ia ashi.

"Delhi aser Guwahati nung kibur tenzükertem masü saka nübortem temeten atema noktakba lennir ka asenoki nungdaker" ta Abhishek-isa shisem.

Ukraine rara ya West-i tenzük, Russia-i temdaksütsü meranger: Putin

Moscow, Tsüklai/February 22 (Agencies): Russia Tir Vladimir Putin-i Mongulbarnü Moscow nung Russian parliament nung jembidang Ukraine nung rara ya West-i tenzük ta tai tongloksü aser ibaji anendaksütsü asoshi Russia-i sepai amshir, ta ashi.

West den jembishinütsü aser tangatetep lenmang bushitsü atema Russia renema liasü aser security tsütsü system kasa atema renema liasü, saka Moscow nem ochimashi telangzüba agütsü, ta NATO ulushia aoba athishia Putin-i ashi.

US aser par tembar linüktem dak tenük yoker pai West aitsü aser 'local conflict' ka 'global conflict' kimdaksü, ta tai tongloksü.

"Asenoki tim yimya nung telangzüba agütsütsü. Asenoki asen linük alitsü indang jembir," ta Putin-i ashi.

Putin-i linük tenüng metetshiaka US tsütsü tekum dangtsü o ashi, kechiaser iba linük yagi tesüiba küm ka Ukraine mitkar nem teyari agüja arur.

"Ukraine nem long-range weapons tem tali agütsüba ama asenok nungi timtem talangbai yoktsü. Mera ka-ka agia asenoki kanga kumdanga asenoki ajangshia aliba nükjidong tongtettsü," ta pai ashi.

Anüolen linük temi Russia den mejungtepner. Western elites temi par nükjidong memiimshir - Russia nung takoksa agütsütsü. Iba tetetzü teti asoshi asenok nungi pilaner, ta Putin-i ashi.

Russia merenshitsü nükjidong nung tenokdangba (sanction) agütsüba ajanga meyiper parnok akoksa aser shir linükisa tenokdangba agütsütsü sangdonga ali, parnok par nübur nem timtem agüja inyaker aser parnok timtemba atema Russia tenüng asener, ta ashi.

"Parnok linüktem nung jenjang atotsü parnok

ajungmeso, factory tem shibang, energy sector lao, aser parnok par nüburtem dang Russia nung tenüng asentsü ashir," ta Putin-i ashi.

Anüolen linük temi Russia tsütsü rongsenketzüng tsütsü tashiyim amshiba sayuogo. Item nung parnok takok mangu. Tenokdangba agütsü tenzük temi par sasa par merenshir, ta pai ashi.

Ukraine nung ya par anüolen kiburtem indang hostage ka ama kumogo aser parnok yimtenren, rongsenketzüng aser mitkar tsütsü linük amokbanga lir, ta Russia tiri ashi.

Tir Volodymyr Zelenskyy-i aniba yimli yagi linük tejangraba tenzüksü melena bendanger tejangraba tenzük, ta pai ashi.

Iba rara nung yariba atema Putin-i Russian mitkar aser nübur dang pelaba lemsatepa liasü.

Paisa Russia-i rakzükba tesem tem nung alirtem Moscow den adenba atema pelaba shia liasü.

"Luhansk, Donetsk, Kherson aser Zaporizhzhia region tem nung aliba nüburtem dang palaka pelaba lemsateper. Ner sasa ner tarutsü jenjang yanglu. Nazi nungeri kiralongra mapa inyaksü amokmerenaka nenoki nenok tejangraba shimogo. Nenok anasa mitkar temi rara liasü, aser nenoki Russia den alitsü shimtet. Nü tetsü tasoli den külemi alitsü nai shim," ta Putin-i ashi.

Russia tiri sobaliba tsütsü kongshia jembir. Pai tetsürtebur kasa amshitsü, tetsür o tetsür mesüra tebur o tebur kibong akumba amala onük tem nunga kongshia jembir aser anüolen linük temi Russia nung loktiliba raksatsütsü meranger, ta ashi.

Wall Street Journal ajanga ashiba agi, China Tir Xi Jinping-i ita ishika tsüngta Moscow semdanga Russia Tir Vladimir Putin den senden amentsü

renemer. Küm ka junga raraba tatem kati arudaksütsü asoshi China-i tali teyakyakba nung shilem agitsü merangba nung shilem ka ama aser telok aika densema yimjung ken o jembitsü asoshi Xi-Putin senden atema sentong yanglur, ta iba osangkaket dang iba sentong meteta alir temi ashi.

China-i iba senden nungsa nuclear nok-nü mamshitsü nenshia jembitsü, ta osang ajanga ashi.

Iba sentong ya tang ang renemba mapang ka nung lir aser koba mapang ka nung aotsü, ajibo ano melemtet, saka Russia-i Nazi Germany madak World War II nung takok anguba benjongba mapang April mesüra May tetenzüklen aotsü akok, ta ashi.

China indang diplomat Wang Yi ya tang Moscow nung lir aser pai Bodhbarnü Russian Foreign Minister Sergey Lavrov den ajuruteptsü imlar.

Europe sema jajaba mapang Wang-i Ukraine nung rara angatetepa tembangtsü ayongzüka liasü, koba taoba küm February 24 nü Russian sepaitemi amak tenzük.

Xi aser Putin na tesüsa ajurutepta ya taoba küm China nung Beijing Winter Olympics tenzüksü aser Russia-i Ukraine amaktsü anasa liasü. Tenati tatem maka tesendaktep alitsü sangdong. Taoba küm December ita tena video call ajanga jembia liasü.

Russia-i Ukraine amakba Beijing-i maitsü mesüra anüolen linük temi Moscow nem tenokdangba agütsüba nunga parnok maden, saka atsüanem akatsü ajungshi aser yimjung nung iba mangatetep ya angateteptsü ajungshia arur.

Ajisüaka Hong Kong aser Xinjiang nung human rights ken o aser tan ita US-i par litsü nung China indang 'spy balloon' ngutetba mechi parnok United States den tesendaktep ya tamajungba kuma lir.

MULUNGNEN O

Onoki teti meima aliba **Asür.Chubanungla**, mapang tatsüka shiranger külen 19.02.2023 anogo nung Kibubai la senti tangu bener aoba anogo tashi, iba ama tako mapang ka nung, ozü dang aria bilema yariteper kiyongertem, yimtsür-yimer, anük-apang, ana aser talang nungi, shisatsü, rongsen, nübu mesasai ozü den asüko lemsatep nung ajak dang kanga pelar ta iba zülu ajanga lemsateper.



Talisa - 1) Kevijau Council, 2) Dimapur Kangtsüng Senso Telongjem, 3) Dimapur Molungyimsen Senso Telongjem, 4) Kevijau Kiyongertem aser 5) Kinunger aser Anükapangtem danga kanga pelar. Onoki tsüngdong arua nenok kija kibong dangi marutet-aka Tulusang Tsüngremi talubusa moajang ta ozü tamang sarasadem. ~ Tetsü aser Chirnurtem.

TEPELA LEMSATEPER



ASO : 29.3.1929

ASÜ : 17.2.2023

"Ni Asoshi Taküm Alibaji Khrista aser Tasübaji Tajangzük" Philipi-1-21

Asenoki teti nungdaka aser meima aliba tsürabur **S.Tsukjem Lemtur** tamang nung mongin, tanüla nung lenjiter "Kibubai nungloksüba tanülar wadang tempanger alima nungi pila-a ogo". Kinungertem mangyim tia"nung alidang shirnoksa nübo, rongsen aser sarasadem agi nungita yaritepogo nenok ajak tang kanga pelar maneni takar Tsüngremi nenok ajak moajangma.

Kinunger, Chirnurtem, Anükapang aser Semchirsepnurtem.

Brazil tzümetsüng nung asür nisung 44 jungogo

Sao Paulo, Tsüklai/February 22 (Agencies): Hopta tatemlen tzünglu kanga sashia aruba ajanga tzümetsüng aser anentsüh adoka nisung 44 takum samatsüba sülen Mongulbarnüa Brazil southeast tsütsü tekumzüker temi nisung aika samar alidak nungi takum alirtem bushia liasü.

Tang tashinung nisung 38 samar aliba osang lir, saka ajak agi 70 ajungtsü amai lir, ta pai ashi.

Sao Paulo southeast tsütsü mile 120 shi pilar nungtu Sao Sebastiao yimti nung ghonda 24 tsüngta tzünglu 680 millimeters (26 inches) shi arua, koba ita ka nung arutsü imlaba dang anasü agi timba liasü.

Nisung 1,730 dak tema khen atema pei kidang nungi anizüker ogo aser nisung 760 shi talidak ki maka lir, ta ketdangtsür temi ashir.

Iba ya otsü tasen yanglua aruba lir, ta state sorkari ashir. Inmet weather service ajanga iba region nung tzünglu ya tan hopta maneni arutsü ashi aser ketdangtsür temi nisung asür 44 jungogo, ta sangdong.

Tanur trok densema nisung 25 mozü kidangi anir ogo aser item rongnung par tenet kangasa mejungi yirur lir.

Ayong tem nung molushi, longsang aser süngdong dener ayimba ajanga tenemtsüng len nisung aliba ki aika raksatsüba sülen timtem nung alir bushia kumzüka maparen nung tetsükdaksü majurui inyaker, ta Sao Paulo governor indang office ajanga ashi.

Tir Luiz Inacio Lula da Silva-i lendong ajurua aliba tesem Hombarnü semdang aser yangji lendong aliba tekum dangtsü shia liasü.

Iba tesem nung search and rescue personnel 1,000 shi lir aser parnok den gari 50, helicopter 14 aser engineering team 53 ajanga yariteper.

Brazil nung nütsüng yongsük million 215 aliba nungi million 9.5 shi tzümetsüng aser anentsüh alutsüsa tesemtem nung alir.

"Asürtem kwi astijar asenoki memetet," ta Sao Paulo governor Tarcisio de Freitas-i item tesem ya helicopter nung sema jajaba sülen ashi.

Long aser molushi agi lenmang aika nokdanga lir, kong anisüngzüka amungertem kar rong tila nung anizüker ao, kechiaser helicopter traffic maneni sashia lir.

Ketdangtsür temi tourist tem dang tzükum anasa nungi ainshitsü ajungshi aser tourist kari helicopter nung aotsü atema sen \$6,000 jungnüa agütsü ta ashir.

Anasa Juquehy tesem nung alirtem hopta tatemlen yipru ajanga aoksatsür alidang ano Mongulbarnep anentsüh tasen alua aoksatep.

Nisung 80 shi pei kidang nungi jena ogo saka asü-amaba mali, ta ketdangtsür temi ashi.



Turkey south tsütsü Antakya yimti nung menoknok tesashi anokdang raksatsür aliba ki balala noksa nung angur. Antakya dang akhi mapang Antioch ta jaa liasü, aser iba yimti ya menoknok agi aiben raksatsüogo. Iba ya ano tan ita menoknok agi raksatsü aser akhi mapang prangshia aliba yimti ya tanaben meyanglutettsü südi, ta nüburtemi jembir.

CL: RealMadrid-i goal 5-2 agi Liverpool kokogo



UEFA Champions League round of 16 nung Liverpool FC den asayaba mapang par team atema tanabuba goal idaktsüba sülen Real Madrid nungi asayar Vinicius Junior aser Rodrygo na pelatepba noksa nung angur.

Tsüklai/February 22, 2023

(Agencies): Taoba küm UEFA Champions League koker aliba team Real Madrid-i taküma knockout stage kanga junga tenzüka Mongolbarnü Round of 16 mezüngbuba leg nung Liverpool goal 5-2 agi kokogo.

Iba asaya nung Liverpool atema Darwin Nunez aser Mohamed Salah nati goal kaka idakja parnok goal 2-0 agi tejakdang akum. Ajisiüka iba sülen parnoki junga masayateti asaya makok aser kidang fan tem tezükdangdaktsüogo.

Kasa mapang nung Real atema mezüngbuba goal Vinicius-i idaktsü aser paisa tanabuba goal idakja liasü.

Asaya nung Real atema tasembuba goal ya Eder Militao-i idaktsü aser Benzema-i goal pezübuba aser pongububa idakja liasü.

Goal ana agi asaya mekoki aliba nungi meyipa aruru asaya akokba sülen Real Madrid ya Champions League asaya ka goal ana agi mekoki aliba nungi meyipa arur goal talila asem agi akokba mezüngbuba team kümogo.

Goal aika idakja asayaba dak alia Anfield nung asaya repringtsü adenshia aliba nüburtemi Real Madrid aser parnok asayartemi otsü tasen aika yangluba nguogo.

Mongolbarnü takok anguba

sülen Real Madrid ya Liverpool indang home ground nung goal pezü mesüra iba dak tali idaktsüba European club tem rongnung mezüngbuba team kümogo.

Goal ana achiba sülen Los Blancos forward Vinicius Jr-i asaya mezüngbuba shilem nung goal ana idakja goal kasasa akum aser iba sülen minute 47buba nung Eder Militao-ia Real atema goal ka idakja parnok tejakdang akum. Ajisiüka minute 55buba nung Karim Benzema-i iba asaya nung goal ana idaktsüba nungi mezüngbuba goal idaktsüba sülen otsü tasen yanglua liasü.

Anfield nung goal ana idaktsüba sülen pa ya Liverpool den asayaba football asayartem rongnungi European Cup aser Champions League puti otsü nung goal timtiba idaktsüba asayar kümogo. Pai Liverpool den asayaba mapang goal trok idakja taoba Chelsea forward Didier Drogba den külemi otsü tasen yanglur liasü. Kasa mapang nung Brazil nung winger Vinicius-ia Liverpool den asayaba mapang goal 5 idaktsür lir. Asaya nungsa Benzima-i alizüng tasen ka tongtetogo aser Messi-i UCL asaya 18 tashi aonga goal idaktsür aliba den kasa kümogo.

Maneni arishi küm 22 tain Vinicius ya CL nung Liverpool indang ground nung tesemdang ama goal ana idaktsüba asayartem rongnung tanobusang kümogo. Iba record ya taoba mapang Barcelona nung asayar Johan Cruyff-i yanglur liasü.

Haiti, Portugal na Womes's World Cup atema qualify süogo

Tsüklai/February 22, 2023

(Agencies): Haiti aser Portugal na tang mezüngbuba FIFA Women's World Cup finals atema qualify süogo. Bodhbarnü New Zealand nung playoff asaya akokba sülen team ana ya qualify süogo.

Portugal-i goal 2-1 agi Cameroon akokba asaya nung Carole Costa-i minute 94buba nung tanabuba goal idakja parnoki asaya akok. Cameroon team ya taoba World Cup ana nung round of 16 tonga asayaba team ka liasü.

Tanga asaya ka nung Haiti-i goal 2-1 agi Chile koka parnoka World Cup atema qualify süogo.

Asaya nung Melchie Dumornay-i goal na idakja jenjang 55buba nung aliba Haiti team World Cup nung asayatsü asoshi maongka agütsüogo. Women's World Cup nung parnok group D nung England, China aser Denmark den asayatsü.

World Cup atema tatembangbuba team asem dang

nungdaka aliba nungi Haiti aser Portugal nati anabo agiogo. Tatembangbuba menden asoshi Paraguay aser Panama na Brehostibarnü asayatsü. Team 32 asayatsü aliba asayamung ya Australia aser New Zealand nati ayongzüka July aser August ita asayatsü.

Haiti tsür Dumornay-i tawa Champions League tenetben tashi koker aliba Lyon team den tenangzüktepba ka yangluogo aser iba club yagi la kechiba alizük aji goal tajung ana idakja kuli agütsüogo. Lai asaya mezüngbuba shilem nung mapang apuloktsür asayaba mapang Roselord Borgella-i agütsüba ball ka idakja parnok 1-0 agi tejakdang aküm.

Atakzükja aliba asaya mapang tembanger mapang apuloktsür asayaba mapang minute tibuba nung Dumornay-i tanabuba goal idakja liasü.

Ajisiüka Jose Rojas-i mapang apuloktsür asayaba mapang minute 11buba nung goal ka idakja Chile atema timla

agütsü ajisiüka parnoki tanabuba goal magütsüteti liasü.

Haiti team ya New Zealand nung playoff asayaba mapang mezüngbuba World Cup atema qualify asütsü atema asaya ana akoktsü nüngdaka liasü. Parnoki Senegal team goal 4-0 agi akok aser iba sülen Chile koka liasü.

Kasa mapang nung Portugal aser Cameroon na asaya Portugal-i amokbanga asaya aser parnoki goal nung 20ben tashi ball metsüoktsü saka Cameroon goalkeeper Cathy Biya-i ayong ayonga nokdanga liasü.

Asaya nung Diana Gomes-i Portugal atema minute 22buba nung mezüngbuba goal idaktsü ajisiüka Ajara Nchout Njoya-ia minute 89buba nung Cameroon atema goal ka idakja kasasa aküm.

Iba sülen Estelle Johnson-i box telung nung handball ka menaba VAR teyari agia asadanga sülen penalty agütsü aser Costa-i iba penalty idakja parnoki asaya akok.

ICC Test Rankings: Anderson maneni temaba jenjangi tuogo

Tsüklai/February 22, 2023

(Agencies): England nung bowler tejen James Anderson tainba küma tajungba asayar ama repringteter aser arishi küm 40 tain bowler ya pa indang career nung tang agi trokbenbuba International Cricket Council test rankings nung temaba jenjangi tuogo.

Arishi küm 40 ser anogo 207 tain Anderson-i Australia nung spacer Pat Cummins ajateta ICC test rankings nung temaba jenjangi atuba asayartem rongnung tambusang kümogo.

Anderson shibai cricket asaya puti otsü nung Test asaya nung wicket timba agir lir, pai taoba hopta England-i Mount Maunganui nung run 267 agi New Zealand madak takok anguba nung tongtibang shilem agia liasü. Iba asaya akokba sülen England team-i Test asaya 11 nung 10 kokogo.

Asaya nung wicket 7 agiba

sülen ajak senteper pai wicket 682 agiogo aser pa 2003 küm mezüngbuba test asayamung asayaba sülen tang mezüngbuba pa indang average 26 tekübok lir. Pai tang tashi kanga junga asaya arudar aser pa arishi küm 35 ajungba sülen test asaya 56 nung wicket 202 agiogo.

ICC test rankings nung temaba jenjang tongteta asayar tejentibaji 1936 küm Australia nung leg spinner Clarrie Grimmett aküm.

Tanabuba test asaya nunga Anderson maneni strike partner Stuart Broad den külemi asayatsü, koba Wellington nung Brehostibarnü tenzüksü.

Tena ya test asaya puti otsü nung bowling partner tajungtiba ta züngshir aser tena senteper tang tashi nung asaya 113 nung wicket 1009 agia lir. Iba record ya Australia nung bowler Glenn McGrath aser Shane Warne na bener liasü. Tenati wicket 1001 agir liasü.

WPL: UP Warriorz captain asütsü Healy shimogo



Alyssa Healy

Tsükali/February 22, 2023

(Agencies): 2023 Women's Premier League (WPL) mezüngbuba season atema UP Warriorz-i Australia tetsür Alyssa Healy captain asütsü shimogo. Capri Global Holdings Private Limited meyong iba club yagi head coach asütsü Jon Lewis aser mentor asütsü Lisa Sthalekar shimba osang sangdongogo.

Healy, shiba tang 2023 T20 World Cup Australia tetsür team nung züngoksema lir, la Australia team nungi T20I asaya 139 nung asayaba mapang run 2,446 yangluogo, kong century ka aser half century 14 densema lir. La ya iba asaya nung wicketkeeper batter tajungtiba ka ta züngshir.

"WPL mezüngbuba season nung UP Warriorz captain mapa abentsü atema maongka agütsüba atema kanga pelar,

koba Mumbai nung asayatsü. WPL asayamung atema onoki yongya ataogo aser UP Warriorz team kanga tajung lir, anungji asayamung tenzüka sülen takok nguyonga aotsü imla atar," ta arishi küm 32 tain Healy-i ashi.

Laisa, "team nung asayar tejen aser lanur asayartem meyoktepa lir aser item asayartem dak fan tem jangrademdaktsütsü atema senpet keta lir. Onok takok angütsü atema mulungteter lir," ta ashi.

Taoba küm Decembr ita Meg Lanning masayaba mapang Healy-i anir Australian team-i India team 4-1 agi koka liasü.

WPL mezüngbuba season ya Mumbai nung March 4 nungi 26 tashi asayatsü atema renema lir. Asayamung nung ajak senteper asaya 22 Brabourne Stadium aser DY Patil Stadium nung asayatsü.

BILEMDANGANG

"O agidang nisung jashidaktsür aser peladaktsür."